



*Kamis, 22 April 2021*

**Ogen: 2 Raja-raja 11:1-3**



**"Nikapken ras Ngepkep Alu keleng Ate"**



Joheseba, sekalak diberu s idem alu perkuah ate, ia anak raja Jehoram, turang Ahasia pedauh nande. Tupung lit persoalen i bas kerajan Israel, i ja Atalia (nande Raja Ahasia) nehken rawana erkiteken kematen anakna. i bas pusuh si getem, iperentahkenna guna munuh kerina anggota keluarga raja. I bas kejadi e kerina keluarga raja mate, Joas anak Ahasia ngenca pulah erkiteken isampati bibina Jehoseba. Radu ras singianisa ibaba Joheseba Joas ku rumah pertoton, ije ibunikenna kalak enda. Enem tahun ikepkepna Joas ras singianisa ndai i rumah pertoton. Alu dem ate keleng iasuh ras ipekena-kenana. Kerina keperlun anak e pe isikapkenna, tuhu-tuhu icidahkenna keleng atena.

Rumah pertoton akap Joheseba ingan si aman muniken Joas ras singianisa. Rumah pertoton ingan mpebelin-belin Joas. Bagi si eteh maka rumah pertoton e ingan Dibata tading, ras ingan bangsa Dibata jumpa ras IA. Ipebelin i bas rumah pertoton e ertina ipebelin i bas Dibata, lit i je pengendesen man baNa. Joheseba la ngasup mpebelin Joas alu gegeh ras pemetehna. Endeskenna man Dibata i bas rumah pertoton alu pengarapen ikut Dibata si pebelin-belinsa. Teridah maka Joheseba enda diberu si rembak ras Dibata.

Kerembakennta ras Dibata empeturah keleng ate i bas pusuh. Kerembakenta ras Dibata erbahansa kita pang nampati kalak si i bas kepiceten, amin galang resiko si man alanken. Em si ibahan Joheseba, lanai iukurina di kune tereteh ia nampati Joas, banci saja ia pe mate ibahan Atalia. Ipelebeina nampati amin ia pe terancam. Bagem kalak si rembak ras Tuhan.

Pang ngalaken resiko i bas nehken kekelengen em biak si perlu ipebelin i bas kerina Moria GBKP. Perlu si inget maka Dibata erpihak man kalaka si dem kelenga ate.